



30. September 2021

UKA2021/17

Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat

(Aningaasaqarnermut Nunamullu Namminermet Naalakkersuisoq)

Siumumiit naalakkersuisut aningaasarsianit akileraarutit pillugit inatsisissatut siunnersuutaannut imaattumik oqaaseqassaagut.

Naalakkersuisut siunnersuutaat annertujaaq, annertorujussuarmillu teknikkikkut pulattarfigisariaqartoq qulequtarpassuarnik isummerfigisariaqakkanik imaqarpoq. Taamaattumik aallarniutigalugu Siumumit oqaatigissavarput ukiaq manna ataatsimiinnitsinni naammassiniarnissaa piviusorsioortutut isiginnginnatsigu, orniginartinnerullugulu Ataatsimiitsitaliaq susassaartoq peqqissaarluni sukumiisumik allannguutissanik eqqissilluni nalilersuillunilu misissuissasoq.

Siunnersuut sulisut biileqartinneqarnerisa akileraarutaasussaataaneritut, sulisut mobilileqartitaanerisa akileraarutaasussaataaneritut, sulisut ineqartitaanerisa akileraarutaasussaataaneritut ilaatigut tungassuteqarpoq. Taassuma saniatigut akileraarutinit ingerlatseriaatsimut allannguneq annertoq siunnersuutaavoq, tassa akileraarutinit B-nit A-nut naatsorsuussinerit nuunneqartussaammata. Taassuma saniatigut sulinermet attuumatillugu angalanerit aamma akileraarusersorneqartalernissaat siunnersuutaavoq. Siumumit maluginiartarput Naalakkersuisut siunnersuutip imarisaasa ilaannaat saqqummiullugit oqaatigigaat.

Siumumit saqqummiussissummi akileraartitseriaatsinik arlalinnik allannguisoqassasoq saqqummiuppaat. Taamaattorli oqaaseqatigiit ilaat imaattut *“Inuit qaffasissumik isertitaqartartut, akeqanngitsumik ajunngitsorsiassanik tigusaqartartut, amerlanerpaajupput, taamaattumillu akileraarutitigut iluaqutissarsititsinernit iluaquserneqartarlutik, ilanngullugit akeqanngitsumik ajunngitsorsiassarsinerit malitsigisaannik. Taamaattumik aamma siunnersuutit aningaasaqarnikkut naligiissitsinerulernissamut sakkussatut isigineqassapput.”* atuarpagut. Taamaattumik Siumumi apeqqutit annertuut isertitaqarnerpaajunngitsunut inatsisissatut siunnersuutip eqquissutigisinnaasai, tassa anguniarneqartup illuatungerluinnaatigut, pisinnaasut sarsuapput.



Naalackersuisut kaammattussavagut allannguiniaraangamik politikikkut oqariartuutiginiakkatik ersarissumik oqaatigisaqqullugit. Tassami Siumumit Naalackersuisut anguniagaat, isertitaqarnerusut akileraarnerusariaqarnerat, ugguuna allanngortinniarnerni pissakinnerusunik eqquisinnaammata maluginiaqqussavarput.

Tassami sulinerup avataani biileqartariaqartartut, ruujorilerisut unnukkoortut ukiumi pinngitsoorneqarsinnaanngitsut, qatserisartut unnukkoortut pisoqartillugu inuunerup annaanneqarnissaanik suligasuartartut, peqqinnissaqarfinni sulisut pigaartuusariaqarnermik pisussaaffeqartut, innaallagialerisut illoqarfiup qamittuunnginnissaanik nakkutiginnittut allarpassuillu ullumikkut biilnik angerlaassisariaqartarput. Taakkartukkakkalu amerlanerpaat ilisimavagut inuussutissarsiornikkut qaffasinnerpaamik akissaasersugaanngitsut.

Taamaattumik naalackersuisunut apeqqutigerusutatta ilagaat, ilumut oqariartuutertik kisitsisitigut eqqortuunersoq uppernarsarsinnaaneraat. Naammanngilarmi akitsuusersuinikkut tamat eqqorsinnaallugit iliuuseqarneq.

Naggataatigut isertitanut ilanngaati 2005-imiit 48.000-imiittup nalimmassaqqinneqartariaqarnera matumuuna apuutissavarput. Naammanngilarmi akitsuusersuutit ukiumut akinut nalimmassarlugu qaffanneqartassappat, illuatungaani innuttaasut sulinerminni isertitaminnut ilanngaataat akit malillugit nalimmassarneqartassanani.

Taama Siumumit oqaaseqarluta siunnersuut sukumiisumik aningaasaqarnermut ataatsimiitsitaliami aappassaaneerseqartinnani suliarineqarnissaa inassutigaarput. Piumasaraarpullu siunnersuut inatsisartut upernaakkut ataatsimiinnissaannut aappaagumut aappassaaniigassanngortinneqassasoq.

Jess Svane, Siumut.